

25. oktober 2018

UKA2018/141

Nuummi illut minillugit Illunik aningaasalersuisarnerup, niueruteqarnerup attartortitsisarnerullu unammilleqatigiinnermik tunngaveqarnerulernissaat pillugu 2020-mi Upernaakkut ataatsimiinnissamut najukkani assigiinngitsuni illut suuneri najoqqutaralugit periarfissat pillugit nalunaarusioqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut. Nalunaarusiami aamma ineriartorneq tamanna siuarsarumallugu periarfissaasinnaasut pingaarnersiorlugit allaasereqquneqarput.
(Inatsisartuni ilaasortaq Justus Hansen, Demokraatit)

Inatsisartunut ilaasortap Justus Hansen, Demokraatit siunnersuutaanut Siumumiik imaattumik oqaaseqassuugut.

Siunnersuuteqartup kissaatingisaa assortoruminaatsikkatsigu oqaatigisariaqarparput, siunnersuuteqartummi kissaataa tassarpassimmat nunatsinni tamarmi illunik nioqquteqartarnerup unammilleqatigiiffiunerusumik ingerlanneqalersinnaaneranut tunngavissanik pigisaqalertariaqartugut.

Nunatsinni isorartooruarmi illut pisortanik pigineqartut tuniniarneqartarnerat naliginnaanngittoq ilisimavarput. Tuniniaasarnerillu tamanut ammasumik tuniniagaasarneranni ajoraluartumik inoqarfimmi assigiinngitsuniittut najuiinnarusuttullu amerlanerpaatigut neqerooruteqartitsinermi ajorsartuusarput.

Tamannalu qaangerniarlugu illuliortarnermi aningaasalersueriaatsit eqqarsaatigalugit politikkikkut iliuseqarnerit assigiinngitsut qujanartumik ingerlanneqarput. Iliuseqarnerit assigiinngitsorpassuit pingaluartut Siumumiik isumaqarpugut aningaaseriviit suliaqarnertik ullumikkumut naleqqiullugu inoqarfimmut isorliunerusunut minnerusunullu tuniluutsittariaqaleraa.

Assersuutugalugu Grl. Banken Aasianni immikkoortotaqarfinguumik pilersitsinermi kingorna takusinnaalerpaa piginneqatigiilluni illuliorsinnaaneq periarfissaqartoq inuillu piumassuseqartut attartornikkut illuliorsinnaanermit. Taamaaliorneq tamatigut inoqarfimmi najukkamut siuariartornermik kinguneqartarpoq.

Siunnersuuteqartup tikitaasa ilangivaat pisortat illuutiminnik tunisinerminni ilaanni akikinaarivallaarlutik tunisisarsimasut. Tamanna tamatta arajutsisimagunangilarput.

Isumaqarpungut amerlanerpaatigut pisisartut tassaasut ukiorpassuarni najukkami tassani najugaqarsimasuusartut. Taamaaliorarneq qujanaquteqartoq oqaatigisariaqarpoq. Imaallaat ilaatigut illu ”aasarsiortarfiinnanngorani” najorneqartuaannarnissaa qulakkeerneqartarpoq. Tassami siuliani taasatsinni tamanut ammasumik tuniniaasoqarnerani ajorsartartut tassaagamik inoqarfimmi najugaqartut najugaqaannarusuttartullu.

Ineqarneq pillugu aqqissuussinerit aqqissuussiniarnerillu politikkit maani aalajangersarneqartut aallaavigalugit sulinerit ingerlasut eqqarsaatigalugit siunnersuuteqartup siunnersuutaa massakkuugallartoq akuersaarnatigu oqaatigerusupparput, naalakkersuisullu inassutigisaat innersuussutugalugu tassaasoq:

”Naalakkersuisut peqquneqassasut, kingusinnerpaamik 2020-mi upernaakkut ataatsimiinnissamut politikkimut aningaasaqarnermullu nassuiaammi ineqarnermut politikkimut immikkoortumi niuerfiup immikkoortuini assigiinngitsuni qanoq iliorluni niuernermik tunngaveqarnerusumik aningaasalersuisarnermi siuarsaaniarluni suliniutit pitsaannerusumik ingerlateqqinneqarsinnaanersut nassuiaasioqqullugit”.

Jess Svane
Siumut